

Sanaartornermut ataatsimiititaliamit

ISUMALIUTISSIISSUT

Uunga tunngasoq:

Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut peqqussutaata nr. 12, 19. November 2007-imeersup Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu, aalajangersakkat allanngortinneqassasut ilaqutariit ataatsit illui tuniniaanermi akitinneqartut kisiisa atorlugit figuneqarsinnaalersillugit.

(Saqq.: Inatsisartunut ilaasortaq Steen Lynge, Atassut)

Siunnersuutip aappassaaneerpeqarneranut tunniunneqartoq.

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Kalistat Lund, Inuit Ataqtigiit, siulittaasup tullia
Inatsisartunut ilaasortaq Jens-Erik Kirkegaard, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Justus Hansen, Demokraatit

UKA 2016-imi ull. 3. oktober siullermeereerpeqarnerani siunnersuut Ataatsimiititaliap misissorpaa.

Aallarniutigalugu Sanaartornermut ataatsimiititaliap naqissuserusuppaa inissialiornermut tapersiissuteqartarneq tunngavigalugu illulianik (BSU-mit tapiiffigineqarluni illulianik) imaluunniit sanaartoqatigiilluni illulianik piginnittut tassaammata illumik namminneq PIGINNITTUUSUT, taamaalillutillu illumi attartortuuginnarnatik najugaqartuullutik. Illumut taarsigassarsiaminnut naafferartumik piffissakaartumik akiliutissatik Namminersorlutik Oqartussanut aningaaserivinnulluunniit akilertarpaat, taamaalillutillu attartornermut akiliuteqartarik. Peqatigitillugulu illuutitik nammineerlutik aserfallatsaalillugillu paarisassaraat najugaqarfugalugillu kiisalu sillimmasersimasussaallugit.

Siunnersuutip imaa aamma siunertaa

Attartortuunermit piginnittuunermut aaqqissuussineq pillugu Inatsisartut peqqussutaat malillugu ilaqutariinnut ataatsinut illunik niuernerup paasiuminartuunissaa niuffaffimmilu akiusut tunngavigalugit ilaqutariinnut ataatsinut illunik tuniniaanermi Nunatta Aningaasiviata isumannaaruttarnissaa siunnersuuteqartup siunertaraa.

Siunnersuutip Inatsisartuni siullermeerneqarnera

Ersaritsitsinissaq paasiuminartuutitsinissarlu partiit akornanni siamasissumik isumaqataaffigineqarpoq. Nalornissutigineqarporli siunnersuut inuuttaasut ilaasa namminerisamik najugassaminnik pisinieranni pingitsoortitsinermik kinguneqarsinnaassanersoq. Pisinermilu akigititap akilernissaanut ikiorserneqartarnermik maanna periarfissaasut ingerlaannassanersut immikkut nalornissutigineqarpoq. Nalornissutit taakku tunngavigalugit siunnersuut Sanaartornermut ataatsimiititaiamut suliassanngortinneqarpoq.

Siullermeerinermi apeqqutit

Siunnersuutip siullermeerneqarnerani arlalinnik apeqquteqartoqarpoq, taakkulu Naalakkersuisunit allakkatigut akisassanngorlugit innersuunneqarput. Ataatsimiititaliaq ulloq 12. oktober akissutisivoq. Apeqqutit apeqqutigineqartut akineqarnerisa saniatigut akissummi aallarniutigalugu uku paasissutissiissutigineqarput:

”Naalakkersuisut kontomut pingaarnermut 72.06.51 Inissianik tunisisarnek, oqaasertaliussamik ilanngussinissamut siunnersuummik saqqummiussinialersaarmata, tassanilu illoqarfinni annerusuni illunik ilaqutariinnut ataatsinut inissianik aamma illunik affarleriinnik, Namminersorlutik Oqartussanit pigineqartunik Namminersorerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaannut nr. 12-imut, 19. november 2007-imeersumut ilaatitsinnginnissamut Naalakkersuisut piginnaatinneqassasut allassimassaaq.

Taamaalilluni Naalakkersuisut inissianik attartukkanik pisinissamut qinnuteqartunut, Namminersorerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq naapertorlugu inissiamik najukkaminnik pisinissamut pisinnaatitaaffeqaraluartunut itigartitsinnaalissapput.”

Ataatsimiititaliap siunnersuummik suliaqarnera

Ataatsimiititaliap paasinninnera malillugu inissiamut akigitinneqartoq pillugu periaatsip saniatigut ”Attartortumit piginnittuunermut aaqqissuussineq” malillugu ilaqutariinnut ataatsinut illunik pisinermi atugassarititaasut iluaqutaasut allanngortinniarnarat siunnersuuteqartup siunertarinngilaa.

Siunnersuut akuerineqassappat pisisoq pigisamik aalaakkaasunik attartortuusimappat taamaalilluni aningaasalersuinnermut taperserneqarsinnaavoq aaqqissuussineq atuuttoq 60-40% atorlugu.

Pigisat aalaakkaasut ilaasa ingammik Nuummi kammalaasersorluni aki atorlugu tunisisarneq pillugu siunnersuuteqartup eqqasuuteqarnera ataatsimiititaliap isumaqatiginngilaa, eqqasuuteqarnerli immi pingaaruteqarpoq.

Inatsimmik tunngaveqarnerup ersarissuunera pigisanillu aalaakkaasunik Namminersorlutik Oqartussat tuniniaanerannut atatillugu pasilliinermik saqqummiussisoqarsinnaannginnera taamaalilluni pingaaruteqarluinnarpoq - aamma Sanaartornermut ataatsimiititaliamut. Kingusinnerusukkullu allorissaartoqarsimannginneranik pasilliutinik saqqummiussisoqarsinnaanera pisisup soqutigisassarinnngilaa.

Siunnersuutip aningaasatigut kingunissai

Inatsisartut suleriaasianni § 33, imm. 1-imi allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassasut.

Ataatsimiititaliap maluginiarpaa tamanna naapertorlugu siunnersuutip piviusunngornerani taamaalillutik aningaasaqarnikkut kingunissai allaaserineqarsimasut, taamaalillunilu siunnersuutip aningaasatigut allaffissornikkullu kingunissai tassaassallutik AC-mi sulisitap ukiumut suliaasa 1/12-ii, taakkulu naalakkersuisoqarfimmi aningaasatigut killiliussanit akilerneqarsinnaanerat naatsorsuutigineqartoq.

Siunnersuuteqartoq aamma ima saqqummiussivoq:

”Peqqussummi maannakkut atuuttumi ilaatigut ima allassimasoqarpoq,
 “Aningaasaqarnermut Pisortaqaqfik tusarniaanermi akissuteqaammimi inissianik illunilluunniit tigusinermi ilaqutariit qaammammut ineqarnermut aningaasartuutissaannut sunniutissat naatsorsorneqartarnerannut assersuutinik ujartuivoq.

Naalakkersuisut isumaat malillugu tamatumunnga assersuutissanik aalajangersimasunik takussutissiortoqassappat tamanna paatsiveerutsitsinermik eqqunngitsumillu paasissutissiinermik pilersitsiinnassaaq, tunisinermut akiusumut, taamaalillunilu taarsigassarsianut akilersuutissanut pissutsit nalorninartut arlaliusussaammata, taakkunangalu nunami sumiiffinni assigiinngitsuni niuerneramik naliliinerit assigiinngitsut kiisalu erniat ineriartornerat tamakkiisoq oqaatigineqarsinnaapput.”

Soorlu siuliani oqaatigineqartut, malunnaatilimmik nalorninartoqarpoq

tunisinerimi akit suut siunissami tikinneqarumaarnersut.

Illut/init siusinnerusukkut akikippallaamik imaluunniit akisuvallaamik tunineqartarsimanersut aamma ersernerluppoq, taamaattumillu aamma qularnaatumik aningaasanut inatsimmut annerusumik minnerusumilluunniit iluanaarutaasinnaanera oqaatigiuminaappoq aammalu oqaatigiuminaalluni tunisinerit amerlariassanersut imaluunniit ikileriassanersut.”

Naalakkersuisut allatut naliliisimangillat, malitsigisaanillu Sanaartornermut ataatsimiititaliaq taamaaliorusunngilaq.


Ataatsimiititaliap inassutai

Ataatsimiititaliaq isumaqatigiittoq akuersissuteqarnissamik inassuteqarpoq, imatut paasillugu Naalakkersuisut oqaasertaliussamut siunnersuummik saqqummiusissasut, taannalu aqunneqarsinnaasoq arlaatigut eqqoriaaneq atornagu, kiisalu naligiissitsinermut tunngaviliussat nalinginaasut isiginiarlugit.

Ataatsimiititaliap naatsorsuutigaa, ullumikkumiit ukiup ataatsip ingerlanerani pineqartup iluani immikkoortukkaartumik inatsiseqarnermut allannguutissatut siunnersuutivimmik saqqummiussisoqassasoq, ataatsimiititaliarmi isumaqarmat Missingersuusiornermut Inatsit naapertorlugu inatsisinik ataavartumik allannguinerit oqaasertaliussat atorlugit ingerlanneqartariaqanngitsut.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.


For




Kalistat Lund,
Siulittaasup tullia




Anders Olsen, siulittaasoq



Jens-Erik Kirkegaard



Justus Hansen



Ane Hansen